

BILTEN

INFORMATIVNE NOVINE ISLAMSKE ZAJEDNICE BOŠNJAKA U ŠVEDSKOJ—MART 2022. / BROJ 47



*Dobro nam doš'o,
Hej mubarek Ramazan!*

Aktuelnosti iz Zajednice

Intervju sa predsjednikom IZBUŠ-a

Intervju sa predsjednikom Udruženja imama IZBUŠ-a



Sadržaj

- 4 Uvodnik
- 5 Intervju sa predsjednikom IZBUŠ-a
- 8 Intervju sa predsjednikom Udruženja ilmiije
- 12 Aktivnosti iz Zajednice
- 20 Crtice iz duhovnosti
- 34 Ramaazanska čestitka





Hej mubarek Ramazan

**Tvojim sjajem obasjan
cjeli svemir razdragan
ko ružičnjak nasmijan
hej, mubarek ramazan.**

**Svjetovima rahmet si
poklon Rabba Svevišnjeg
Ummetu si nagrada
hej, mubarek ramazan.**

**Među dvenest mjeseci
kao sunce sijaš ti
Kur'an siđe u tebi
hej, mubarek ramazan.**

**Svih mjeseci car si ti
od Dženneta ključ si ti
utočište griješnih
hej, mubarek ramazan.**

**Rahmet — prva trećina
a druga je magfiret
treća vatri selamet
hej, mubarek ramazan**

**U dušama Tvoj je mir
u kućama Tvoj miris
veselje si i radost
hej, mubarek ramazan**



U proteklom mjesecu održane skupštine u gotovo svim našim džematima. Svjedočili smo veoma lijepim skupovima. Skupštine naših džemata sve više liče skupštinama švedskih organizacija. Sve je više međusobnog uvažavanja, tolerancije i parlamentarizma.

Bilo je, međutim, i nekoliko skupova koji su nas dobrano vratili u neka prošla vremena. Svjedočili smo i neprimjerenom ponašanju, svađama i animozitetima, gotovo neprijateljstvu, pa nam se učinilo da bi se za ovu priliku bilo korisno prisjetiti jedne značajne hutbe bivšeg reisu-l-uleme dr. Mustafe-ef. Cerića, koja je, bila dova i apel za pomirenje braće u Bosanskoj krajini. Poruke ove hutbe su univerzalne, pa ih, kroz nekoliko citata, toplo preporučujemo i nama svima.

„Uvijek je bolje praštati nego moliti za oprostaj. Uvijek je bolje poklanjati ljubav nego ljubav tražiti. Uvijek je bolje davati nego uzimati...”

Nakon što je bio u prilici da se osveti svojoj braći koji su ga bacili u bunar u

namjeri da mu uzmu život, Jusuf, a.s., izriče riječi: „Ja vas sada neću koristiti. Allah će vam oprostiti, jer od milostivih On je najmilostiviji.” (Sura Jusuf, 92)
Nakon pobjedničkog povratka u Mekku

Muhamed, a.s., se obratio Kurejšijama, svojoj braći koji su ga protjerali i godinama ratovali protiv njega i upitao ih: „Čemu se sada nadate”? „Dobru se nadamo! Od plemenitog brata! Od sina plemenitog brata, koji sada može učiniti što hoće” – rekoše. „Želim vam reći sto ono što je moj brat Jusuf, a.s., rekao svojoj braći: Ja vas sada neću koristiti”.

I na kraju, proučimo i dio dove iz ove hutbe:

„Allahu Svemogućí, osnaži nam volju za istinom, pravdom i pomirenjem. Osposobi nas da volimo svoga brata i da mu oprostimo ako je prema nama grijeh počinio. I obdari nas, Bože, snagom da od svoga brata oprost tražimo ako smo mi prema njemu pogriješili. Allahu Svemogućí, pouči nas da vidimo dobro koje je ispred nas a ne zlo koje je iza nas. Nauči nas da govorimo lijepe riječi jedni drugima. Uputi nas, Bože, da nađemo otvoreni put do srca našega brata. Pokaži nam, Bože, znak Tvoje milosti koja će nas voditi milosti našega brata...”

Ovoj dovi pridodajemo i dovu da nas Allah, dž.š., obraduje svim blagodatima dolazećeg ramazani šerifa.

Ramazan šerif mubarek olsun!

Idriz-ef. Karaman

IDRIZ-EF. KARAMAN
GLAVNI IMAM

INTERVJU

”

Ovom prilikom bih želio čestitati nastupajući mubarek mjesec Ramazan u želji da svima nama Allah, dž.š. podari zdravlje, bereket i nafaku i neka nam ramazanski dani budu sretni i uspješni. Neka nas sve prati Allahova milost i oprost, neka nam mubarek Ramazan učvrsti nas iman, neka nas rastereti naših briga i teškoća, neka nam Allah, dž.š. ukabuli naša dobra djela i neka nas upiše među one sa kojima je On zadovoljan, Amin!

Mehmed Hasanbegović

Predsjednik Islamske zajednice Bošnjaka u Švedskoj



Poštovani g. Hasanbegović, na Skupštini islamske zajednice Bošnjaka u Švedskoj koja je održana 12. marta 2022. godine izabrani ste za predsjednika IZBUŠ-a. U ovom kratkom razgovoru za Bilten naše Zajednice, prvo ću vam čestitati izbor za ovako veliku poziciju u Zajednici, a nakon toga ću Vas zamoliti da se ukratko predstavite našim čitateljima. Recite nam ko je Mehmed Hasanbegović?

Zahvaljujem se na čestitkama. Zaista je velika čast dobiti priliku biti na čelu jedne ovako velike i ozbiljne zajednice. Dat ću sve od sebe da ponese zajednicu dalje uz dovu Svevišnjem da me ne optereti preko mojih mogućnosti što mogu ponijeti. U ovaj zadatak ulazim i s velikom dozom bojaznosti pred Stvoriteljem, jer biti vođa jedne ovakve organizacije je ogromnu odgovornost.

Ja sam rođen u Bosanskoj Gradišci i sa svojih 13 godina 1992. sam dosao u Švedsku. Oženjen sam i imam tri kćerke. Po struci sam sociolog i trenutno obnašam dužnost direktora pri regionalnoj

organizaciji u regiji Örebro gdje i živim. Sport me je pratio kroz cijeli život i dugo godina sam se bavio rukometom.

Bit ćete predsjednik IZBUŠ-a u mandatu 2022-2026. U tom periodu, tačnije 2025. godine, IZBUŠ će obilježiti jubilej 30 godina od osnivanja. U ovom periodu rada i djelovanja IZBUŠ-a urađeno je, zaista, puno posla i ostvareni su veliki rezultati. Šta su po Vama najveći uspjesi u dosadašnjem radu IZBUŠ-a?

Svaki saziv odbora zajednice je imao svoje ciljeve i strategije. Sve je to bilo tačno za to vrijeme što nam i danas rezultati pokazuju. Kad kažem da je ponosno biti dio ovog onda mislim na kontinuitet koji je bio u toku svih ovih godina. Ja kao Bemufac pa zatim kao odrasli član zajednice sam pratio rad i razvijanje i ipresiran sam ljudima koji su pomagali i zalagali se da dodjemo do ovog sto danas imamo. Ovdje mislim od onih malih džemata sa svojim imamima koji su radili za honorare i na dobrovoljnoj volji do naših velikih džemata i njihovih uposlenih. Svako je na svoj način doprinio i dalje doprinosi da svaki dan budemo sve jači i stabilniji. Ako mogu nešto posebno da izdvojim onda je to projekat članarine preko poreza, ne zato sto sam taj mandatski period bio član odbora IZBUŠ-a nego zato što smatram da je to zaista bio odlučujući korak ka ovoj stabilnosti.

Živimo u vremenu velikih dešavanja i brzih promjena u svijetu, na mikro i makro planu, promjena koje traže našu budnost, svjesnost i ažurnost. Šta su po vama najvažniji projekti i planovi na kojima ćete, zajedno sa Izvršnim odborom, posebno raditi i imati fokus u vašem mandatu?

Trenutno nisam ponosan nasim jedinstvom. Želja mi je da nivo jedinstva bude mnogo veći. Primjetio sam da trebamo poraditi na edukaciji po pitanju liderstva kako na lokalnom tako i na saveznom nivou organizacija. Pitanju nosilaca zajednica, to jeste imama, želim isto tako da se posvetim. To je nekih par fokusa koje trenutno ističem ovdje.

Životni moto Mehmeda Hasanbegoviću u jednoj rečenici?

Mi planiramo, a Allah, dž.š., odlučuje.

Hvala vam! Svakako, bit će prilike da opet govorite za naš Bilten. Na kraju, zamolit ću Vas da pošaljete kratku ramazansku poruku i čestitate nastupajući mubarek Ramazan našim čitateljima.

Ima li veće ovozemaljske radosti mimo šehri Ramazana? Doista, mislim da ih nema ili je ih jako malo.

Ovom priliko bih želio čestitati nastupajući mubarek mjesec Ramazan u želji da svima nama Allah, dž.š. podari zdravlje, bereket i nafaku i neka nam ramazanski dani budu sretni i uspješni. Neka nas sve prati Allahova milost i oprost, neka nam mubarek Ramazan učvrsti nas iman, neka nas rastereti naših briga i teškoća, neka nam Allah, dž.š, ukabuli naša dobra djela i neka nas upiše među one sa kojima je On zadovoljan, Amin!

Ramazan Šerif Mubarek Olsun!



Prediftarški program

**Svaki dan Ramazana
u 19:00h!**



LIVE



Moj životni moto bi definitivno bio Kur'anski ajet iz sure Et-Tevbe i jedan hadis Poslanika s.a.v.s.

Ajet je sljedeći: "Trudite se! Allah će trud vaš vidjeti, a i Poslanik Njegov i vjernici"

A hadis bi bio ovaj: "Radi za ovaj svijet onoliko koliko ćeš na njemu ostati, za budući svijet radi onoliko koliko ćeš tamo boraviti, za Allaha onoliko koliko ti je potreban, a za vatru onoliko koliko je možeš trpiti."

Vidite. Čovjek je stvoren vertikalno-uspravan. Pred svim u životu s čim se susretnemo, takav treba biti, uspravan i nikako drugačiji.

Suad-ef. Kazaferović

INTERVJU



Poštovani Suad-ef., hvala Vam što govorite za Informativne novine Islamske zajednice Bošnjaka u Švedskoj.

Za početak, zamolit ćemo Vas da se ukratko predstavite našim čitateljima.

Bismillah ve salatu ve selamu ala resulillah.

Iskreno selamim sve naše pratioce i čitatelje i hvala Vama što ste me ponudili da govorim za informativne novine naše Islamske zajednice.

Rođen sam u Bihaću gdje sam završio osnovnu školu i gdje sam odrastao. Medresu sam završio u Zagrebu i tu sam proveo jedan lijep period svoga života. Fakultet Islamskih nauka sam završio u Sarajevu, gdje sam dvije godine uz studij radio kao imam na Vratniku. Poslije toga sam radio kao imam u Prijedoru skoro devet godina. Tokom boravka i rada u Prijedoru, kao muž i otac, uspio sam upisati i završiti i Islamski pedagoški fakultet u Bihaću. Nakon toga sam razmišljao gdje dalje nastaviti živjeti sa svojom porodicom, jer život u manjem BH entitetu RS-u, nije bio baš sjajan. U nekom kasnijem periodu dobio sam ponudu za dolazak u Švedsku, što sam na kraju i prihvatio. I evo me sad tu u kolektivu naše Islamske zajednice Bošnjaka u Švedskoj.

Vi ste imam u džematu Landskrona. Našem čitateljstvu ukratko predstavite džemat Landskronu, trenutne aktivnosti i buduće projekte?

Tako je, imam sam u džematu Landskrona već tri godine. Naš džemat je osnovan 1994. godine i koncem mjeseca oktobra obilježili smo 27 godina od osnivanja našeg džemata.

Naš džemat je elhamdulillah aktivan na svim poljima. Iako je relativno mali grad Landskrona, naš džemat je izuzetno živ. Imamo redovne dnevne i sedmične aktivnosti kao što su dnevni namazi, džuma, mekteb za djecu, mekteb, odnosno vjersku pouku za odrasle. Imamo doista veliki broj djece u mektebu, tako da i imam i ispomoć u radu, moje supruge muallime. Redovno imamo predavanja i susrete naše omladine, kao i porodična i džematska druženja, koja su izuzetno posjećena. Osnovali smo mektebski hor i hor odraslih koji uzimaju učešća na svim našim vjerskim manifestacijama. Ono što je zanimljivo vezano za hor odraslih, taj hor čine uglavnom mladi bračni parovi i sad nas ima preko 20 u tom horu, a sve je krenulo kad su isti ti roditelji dovodeći svoju djecu na probe hora, tad je iznikla ideja za ovakvu vrstu druženja, zanimljivo je i hvala Bogu funkcioniра.

Zbog pandemije određene ideje i planovi su morali malo ostati po strani, ali evo sad po pitanju budućih projekata planiramo osnažiti već postojeću komunikaciju i aktivnosti kako sa susjednim džematima, tako i sa ostalim džematima u Švedskoj. Poboljšati i podići na veći nivo vjerski život u našem džematu.

Evo lijepa vijest je i da smo dobili mandat na prethodno održanoj džematskoj skupštini da krenemo u realizaciju kupovine vakufskih prostorija za naš džemat. Sve ovo pobrojano je rezultiralo i velikim povećanjem članstva u naš džemat. Prvenstveno hvala Allahu na tome, a i našim džematlijama koji podržavaju naš rad. Naravno brojne aktivnosti i projekti su pred nama, na nama je da se trudimo i ne sumnjamo ako Bog da u uspjeh.

Na zadnjoj Skupštini Udruženja ilmije izabrani ste za predsjednika. Koristimo ovu priliku da Vam čestitamo ovaj izbor i zamolimo da podjelite s nama koji su planovi i prioriteti u aktivnostima Udruženja u Vašem mandatu?

Hvala Vam od srca. Jeste na zadnjoj skupštini udruženja ilmije IZBUŠ-a izabran sam za predsjednika. Moje kolege imami su mi dale povjerenje da vodim ilmiju zajedno sa njima u narednom periodu i evo i ovim putem im se zahvaljujem na tome.

Što se tiče planova njih ima dosta. Vidite, da Vam kažem. Na žalost, svi svjedočimo kakvo se je tmurno vrijeme nadvilo nad bošnjačkim narodom, neprijatelji našeg naroda izniču kao gljive poslije kiše, u tome nisu izuzeli ni našu islamsku zajednicu.

Imajući sve to u vidu, prioritet će nam biti jedinstvo, sloga, snažna islamska zajednica, jaka ilmijja, a na koncu najvažnije nam je Božije zadovoljstvo. Ako to imamo, siguran sam da Božija pomoć neće izostati.

Moramo čuvati i poboljšavati ono što je već izgrađeno. Brojne generacije prije nas su uložile velike napore i trud da imamo ovo što sad imamo. Pred ilmijom su brojni projekti i aktivnosti. Izdvojio bih planirane edukativne tribine i seminare, na kojima bi učešće uzeli istaknuti alimi naše zajednice. Edukativna putovanja i susreti sa imamima i zajednicama iz drugih zemalja i naše domovine.

Uključiti u aktivnosti ilmije naše penzionisane imame, koje ne smijemo zaboraviti, kao i svršenike medresa i islamskih fakulteta, koji nisu direktno uključeni u imamsku službu i rad u zajednici. Također pojasniti i približiti način rada ilmije i našim džematlijama. Više i otvorenije približiti naš rad, drugim vjerskim zajednicama i švedskom društvu. Dosta je toga što je pred nama da se uradi i da ako Bog da to i realiziramo. Svakako u planu nam je osnažiti i povećati naše članstvo u ilmiji. To bi bilo nešto najosnovnije kazano.



Suad-ef., pored svih radnih obaveza Vi, naravno, imate i svoj privatni život. Na koji način se odmarate, kako koristite Vaše slobodno vrijeme?

Vi ste kolega isto imam, znate da nama veoma često fali sati u jednom radnom danu. Specifičnost našeg posla ima dosta radnih aktivnosti vikendom, to ne ostavlja previše slobodnog vremena za provesti sa porodicom, jer obično kad smo mi slobodniji oni su zauzeti u radnoj sedmici, obavezama u školi, u vrtić, na poslu i u sportu. Ali kad nađem vremena pokušavamo ga zajedno provesti u prirodi, šetnjama, zajedničkim igrama sa djecom, ponekad se nađe vremena da se ode i na plivanje, ali sve je to poprilično oskudno. Jedino što pokušavam je da redovno spavam. Ali eto, elhamdulillah, to je teret našeg poziva i sa tim se treba naučiti nositi i živjeti, očekujemo nagradu kod Uzvišenog.


Na kraju, sa čitateljima Biltena podjelite Vaš moto, možda je to neki ajet, hadis ili izreka koja vas posebno inspiriše i daje snagu za rad i uspjeh!

Moj životni moto bi definitivno bio Kur'anski ajet iz sure Et-Tevbe i jedan hadis Poslanika, s.a.v.s. Ajet je sljedeći: "Trudite se! Allah će trud vaš vidjeti, a i Poslanik Njegov i vjernici!"

A hadis bi bio ovaj: "Radi za ovaj svijet onoliko koliko ćeš na njemu ostati, za budući svijet radi onoliko koliko ćeš tamo boraviti, za Allaha onoliko koliko ti je potreban, a za vatru onoliko koliko je možeš trpiti."

Vidite. Čovjek je stvoren vertikalno/uspravan. Pred svim u životu s čim se susretnemo, takav treba biti, uspravan i nikako drugačiji.

Hvala Vam na prilici da razgovaramo!



AKTIVNOSTI IZ ZAJEDNICE



ODRŽANA SKUPŠTINA UDRUŽENJA ILMIJJE ISLAMSKJE ZAJEDNICE BOŠNJAKA U ŠVEDSKOJ



Dana 24.01.2022. godine, ponedjeljak, u Jönköpingu održana je redovna skupština Udruženja Ilmijje Islamske zajednice Bošnjaka u Švedskoj.

Skupština je otpočela učenjem Kur'ana i prigodnim obraćanjem aktuelnog predsjednika Udruženja Ilmijje, te izborom radnog predsjedništva skupštine.

U toku skupštine jednoglasno su usvojeni normativni akti Udruženja Ilmijje, izvještaj o radu, finansijski izvještaj, kao i izvještaj nadzornog odbora za 2021. godinu. Istaknut je i pohvaljen rad organa u 2021. godini i izraženo zadovoljstvo urađenim na polju povećanja broja članova, održavanjem sastanaka i seminara, kao i transparentnim radom na svim poljima.

Usvajanjem pomenutih izvještaja dosadašnji organi Udruženja Ilmijje oslobođeni su odgovornosti, te se pristupilo usvajanju plana rada i budžeta za 2022. godinu. Uzimajući u obzir opće stanje pandemije i mjere izazvane corona virusom skupština Udruženja Ilmijje je dala u zadatak izabranom odboru Udruženja Ilmijje da u skladu sa svojim ovlaštenjima, prilikama i potrebama planira aktivnosti i budžet u 2022. godini poštujući sve mjere u zaštiti zdravlja članova Udruženja Ilmijje i njihovih porodica.

Odlukom skupštine Udruženja Ilmijje izabrani su organi Udruženja Ilmijje kako slijedi:

Upravni odbor:

Suad ef. Kazaferović – predsjednik
hafiz Adis ef. Baručić – sekretar
Hamza ef. Terzić – blagajnik
Mubin ef. Neimarlija – član
Hasan ef. Jašarević – član
Ismail ef. Mehtić – rezervni član
Mersed ef. Delić – rezervni član

Nadzorni odbor:

Idriz ef. Karaman
Mustafa ef. Šetkić
hafiz Jusuf ef. Horozović

Sud o članstvu:

Idriz ef. Karaman
hafiz Adis ef. Baručić
Almedin ef. Spahić

Na kraju skupštine prisutnima se obratio Glavni imam Islamske zajednice Bošnjaka u Švedskoj, Idriz ef. Karaman, izražavajući svoje zadovoljstvo održanom skupštinom i upućujući prigodne savjete prisutnim imamima. Nekoliko završnih riječi i napomena uputio je i novoizabrani predsjednik Udruženja Ilmijje, Suad ef. Kazaferović, podsjećajući prisutne na bitnost njihovog angažmana u svim domenima rada Udruženja Ilmijje.

Skupština je završena učenjem Kur'ana i dovom.

Udruženje Ilmijje Švedska, 2022-01-25

U SUBOTU, 12. MARTA 2022., ODRŽANA SKUPŠTINA ISLAMSKJE ZAJEDNICE BOŠNJAKA U ŠVEDSKOJ

U subotu, 12. marta 2022. godine u gradu Jönköping održana je redovna izborna Skupština Islamske zajednice Bošnjaka u Švedskoj. Uz prisustvo 61 delegata iz 23 džemata, te članova Izvršnog odbora i drugih organa IZBUŠ-a, Skupštinom je predsjedavao Jasmin Fočo, predsjednik Skupštine.

Skupština je otvorena ašeretom kojeg je proučio hafiz Jusuf Horozović, imam Džemata Linköping, a onda su se Skupštini obratili gosti Ilijaz Kenjar, u ime humanitarne organizacije Merhamet Švedske, te Kenan Zec, u ime omladinske organizacije Bemuf.

U radnom dijelu zasjedanja prvo je usvojen novi Poslovnik o radu Skupštine, a onda su podneseni i usvojeni: izvještaji o radu i finansijama, te izvještaj Revizione komisije. Uslijedilo je usvajanje Pravilnika o vakufskom fondu, čime je i zvanično osnovan ovaj fond, a zamijenit će dosadašnji fond solidarnosti. Nakon toga su usvojeni Plana rada i budžeta za 2022. godinu.

Izbor novih organa obavljen je tajnim glasanjem. Za predsjednika, između dva kandidata, Mehmeda Hasanbegovića iz Džemata Örebro i Merfida Selimovića iz džemata Borås, izabran je Mehmed Hasanbegović.

U novi Izvršni odbor izabrani su: Devleta Džanić, Merjema Jašarević, Mubin-ef. Neimarlija, Hamza-ef. Terzić, Mustafa Sulejmanagić, Mehdi Salihović, kao redovni članovi, te Fuad-ef. Čolić, Amel Osmanović i Asim Curkić, kao rezervni članovi.

Po funkciji, redovni članovi Izvršnog odbora su i glavni imam Idriz-ef. Karaman, te predsjednik Bemufa, koji će biti izabran na Skupštini Bemufa 26. marta 2022.

U Revizionu komisiju izabrani su: Ilijaz Bešić, Asim Repuh i Inas Delić.

U Izbornu komisiju izabrani su: Alen-ef. Salkić, Enes Delić i Smajo-ef. Šahat.

U Statutarnu komisiju izabrani su: hafiz Adis

Baručić, Almedin-ef. Spahić i Ašk Gaši. U Komisiju za ženski aktivizam izabrane su: Devleta Džanić, Merjema Jašarević i Mevlija Alić.

Nakon izbora novih organa dosadašnjim članovima Izvršnog odbora uručen je prigodan poklon, a Skupštini se kratko obratio novoizabrani predsjednik Mehmed Hasanbegović.

Skupštinsko zasjedanje okončano je dovom, koju je proučio glavni imam Idriz-ef. Karaman.

I.K.



ODRŽAN PREDRAMAZANSKI SEMINAR IMAMA IZBUŠ-a

U ponedjeljak, 28. marta 2022. godine, u Jönköpingu je održan je predramazanski seminar za imame IZBUŠ-a.

U prvom dijelu seminara pročitana je hutba bivšeg reisu-l-uleme dr. Mustafe-ef. Cerića o nužnosti pomirenja u Bosanskoj krajini, kazivana davne 2005. godine. Nakon pročitane hutbe imami su, umjesto diskusije, šutili i razmišljali o porukama ove hutbe u kontekstu posljednjih dešavanja u našoj Zajednici.

U drugom dijelu seminara Elvedin-ef. Bašlija, imam u Džematu Borås, prezentirao je planirane ramazanske aktivnosti u svom džematu, a onda se otvorila široka diskusija o aktivnostima u drugima džematima. Na kraju je zaključeno da se sve sugestije saberu i da to bude osnova za cjelokupne ramazanske aktivnosti.

Nakon završenog seminara podijeljeni su blokovi za zekat i vitre.

I.K.



Dana, 28. februara 2022. je u Landskroni u prepunoj sali Folkets Hus centra održana peta manifestacija u Skandinaviji, povodom 1. marta, Dana nezavisnosti BiH. Skup je počeo prikazivanjem dokumentarnog filma, kulturnim programom i obraćanjem zvanica, čime je na dostojanstven način obilježeno 30 godina od nezavisnosti Bosne i Hercegovine.

Prisutnima su se obratili Salem Marić, predsjednik Gradskog vijeća Mostara, Alija Tabaković, predsjednik Kluba Bošnjaka u Vijeću naroda RS, Arif Kovačević, zastupnik u Skupštini Kantona 10, Jasmin Spahić, potpredsjednik Skupštine Bosanska Dubica, Mustafa Gradašćević, potpredsjednik Skupštine Bijeljina i Adis Tanović, predsjednik Centra za dijasporu Mreža. Ispred domaćina obratio se Suad ef. Kazaferović, imam džemata Landskrona. Kulturno zabavni program su izveli učenici mekteba džemata Landskrona te članovi folklora udruženja „Ljiljan“.

Dio iz obraćanja Suad-ef. Kazaferovića:

”Veliki broj Bosanaca i Hercegovaca, doista, uz sve nedaće i nepravdu koja je prisutna u našoj domovini, istinski voli i bori se za svoju domovinu, a to potvrđuje i ovo vaše prisustvo na večerašnjoj manifestaciji.

Želim vam večeras poručiti, da budemo budni, da ne spavamo i da ne mislimo kao pred 90-te godine, ovo će nas zaobići, a onda ishod takvog razmišljanja je bio za nas, kao narod, fatalan.

Olovka i pametno djelovanje je nešto što nam

ove godine najviše može pomoći, posebno u manjem bh entiteu.

Ja sam siguran da uz božiju pomoć, bošnjačku hrabrost, budnost i entuzijazam možemo prevazići sve probleme, pa i ove“.

Svim bošnjacima i građanima bosne i hercegovine, čestitamo ovaj značajan dan za sve nas! Neka dragi bog čuva naš narod i našu domovinu!

Organizator skupa su bile BH organizacije u Landskroni, u saradnji sa Centrom za dijasporu “Mreža”

Priredio S.K



KLUB KNJIGE

U našem džematu se odvija niz aktivnosti na koje smo ponosni, ali bi ovaj put izdvojili jednu a to je „Klub knjige“, aktivnih žena džemata Malmo.

Ideja „Klub knjige“ nastala je poslije godišnjeg seminara za žene, pa se tako skupina žena okupila oko knjige na čelu sa muallimom džemata Merjemom hanumom i oformila klub.

U početku smo čitali knjigu „Muhadise“, koja je sama po sebi inspiracija i tjera čitaoca na razmišljanje. A nakon toga smo pred ramazan uzeli knjigu „40 odabranih hadisa“ sa željom da što više hadisa naučimo bar na bosanskom jeziku uz dovu Gospodaru da po njima postupamo i oživimo sunnet.


Nadamo se da će i hanume, omladina drugih džemata uzeti ovu aktivnost kao primjer očuvanja jezika i tradicije, te okupljanja oko pisane riječi.

/ Merjema Jašarević, muallima



„OH, KAKO JE DOBRO
BITI MEĐU LJUDIMA KOJI
ČITAJU KNJIGE.“

– **RAINER MARIA RILKE**



Uzvišeni Allah je stvorio čovjeka kao društveno biće i iz te perspektive su druženja sastavni dio njegovog života. Nemoguće je da se čovjek nikad ne druži i ne priča sa drugim ljudima. Društveni život podrazumijeva čitav spektar aktivnosti, od posjeta bolesniku, odlaska na različita veselja, dočeka i ispraćaja gostiju itd. U svim tim prilikama, ljudi se međusobno upoznavanju i dolaze u kontakte i razgovaraju. U ovom segmentu čovjekovog života, a posebice u životu vjernika, najvažnije je odabrati dobro društvo.

Uzvišeni Allah kome bude želio dobro, olakšat će mu pronalazak dobrog društva. Ako se nekada i dogodi da se vjernik zadesi na lošem skupu, iskoristit će tu situaciju da nauči lekciju i uzme poruku i u najmanjem mogućem vremenu napustit će takvo društvo.

Bemuf Helsingborg, poslije dugo vremena, je krenuo u nove avanture .

Prva ovogodišnja avantura je ostavila na mene veoma dobar i pozitivan utisak. Naime, 19.3.2022, organizovali smo druženje sa omladinom iz drugih gradova Malmö, Landskrona, Halmstad, Gislaved i Västerås.

Ovo druženje je bilo veće od mojih očekivanja, ta radost, pozitiva, komunikacija među omladinom me najviše obradovala. Svrha i cilj naših sastajanja je upoznavanje, veća komunikacija, sticanje novih prijatelja, i također, ono najvažnije njegovanje bosanskog jezika.

Napravili smo kviz o Bosni i Hercegovini, da se zabavimo, a i naučimo nešto o našoj domovini.

Iznenadilo me to poznavanje o historiji naše domovine i koliko zapravo omladina zna i koliko je učila o tome.

Lijepo je vidjeti toliko momaka i djevojaka na jednom mjestu koji vole i pricaju svoj jezik. Zaista sam ponosna na sve, koji pored svojih obaveza nađu vremena za dolazak na druženja, susrete, razne aktivnosti itd. Također sam ponosna i na naše imame koji pored tolikog posla ipak odvoje svoje vrijeme i budu dio svakog našeg druženja, uz predavanje i odgovore na naša pitanja.

Ovo pišem jer zelim predstaviti jedan dio rada, zalaganja i jednog od ciljeva naše BEMUF organizacije. Nadam se što većim druženjima i novim poznanstvima u budućnosti.

Mahsuz selam

Predsjednica Bemufa Helsingborg

Sejdić Elma-Edita





Som tack för sitt folkbildande arbete för svenskbosnier tilldelas nu studieförbundet NBV priset "Bosniens vänner". – Det är ett kvitto på att vårt arbete gör konkret skillnad vilket är det bästa kvitto man kan få, säger Andrea Lavesson, tf Förbundsrektor för NBV.

Den 1 mars firar Bosnien-Hercegovina 30 år av självständighet. Lika länge sen är det kriget började. Tiotusentals bosnier flydde till Sverige och startade nya liv. Många av de bosnier som då blev svenskar har haft stor nytta av NBV:s verksamhet under tre decennier. Som tack för det vill föreningarna dela ut priset "Bosniens vänner" till NBV.

Priset delas ut till två pristagare vid arrangemanget Tacksamhetsdagen på Norrmalmstorg i Stockholm den 6 mars. Förutom NBV får även läkaren Christina Doctare utmärkelsen. Hon arbetade på Balkan under och efter kriget.

Läs hela artikel på: [30 år av självständighet – nu prisas NBV | NBV \(tt.se\)](https://tt.se/30-ar-av-sjolvstandighet-nu-prisas-nbv)

Broj članova po džematima

	18.01.2022	15.03.2022
Malmö	2013	2054
Stockholm	1659	1662
Göteborg	1286	1299
Örebro	1058	1058
Norrköping	996	1014
Borås	979	980
Skövde	807	818
Landskrona	717	715
Västerås	705	704
Gislaved	677	690
Helsingborg	645	651
Värnamo	637	636
Linköping	574	574
Jönköping	548	556
Växjö	466	467
Trelleborg	423	433
Halmstad	425	429
Trollhättan	367	369
Motala	249	249
Kalmar	214	215
Varberg	193	196
Vetlanda	168	171
Surte	161	161
Trosa	140	140
Karlstad	110	110
Oskarshamn	20	20
Karlskoga	4	4
Ukupno	16241	16375



CRTICE IZ DUHOVNOSTI



Naš Stvoritelj Allah, dž. š., daje nam život i smrt da bi nas ispitao i provjerio kako ćemo i na koji način postupati. Isto tako, Gospodar nam daruje neizmjerne blagodati ali i iskušenja da bismo pokazali ko je zahvalan a ko nezahvalan, ko je pokoran a ko nepokoran, ko je strpljiv a ko malodušan, i od stvaranja prvog čovjeka, od Adema, a. s., do Sudnjeg dana ljudi će biti iskušavani, i niko nije izuzet od ovoga Allahova pravila. Stoga je pogrešno misliti da se iskušenja dešavaju samo nama, iskušenja su se dešavala i onima prije nas a dešavaju se i onima oko nas.

Živimo u vremenu većih ili manjih iskušenja, u atmosferi promocije lažnih vrijednosti i beznađa, ali, u koliko god bili teškoj životnoj situaciji, jedino rješenje i izlaz iz takvih stanja i okolnosti možemo pronaći u iskrenu vjervanju. Vjerovanje prati svijest da Allah, dž. š., svoje robove stavlja na kušnju i u dobru i u zlu, da ih iskušava s radošću ili žalošću.

Allahov Poslanik, a. s., opisuje različita stanja vjernika i njegov odnos naprema iskušenja radosti i žalosti: "Divan li je primjer vjernika koji je uvijek na dobitku, a tako je samo sa vjernikom. Ako ga zadesi radost, on se zahvali Allahu i bude mu dobro. A ako ga zadesi kakva žalost, on se strpi pa mu opet bude dobro." (Muslim)

Islam je lahka vjera, vjera u kojoj ništa teško nije propisano i upravo u njoj treba tražiti olakšanje. Nažalost, mi ljudi ponekad sami sebi otežavamo, ponekad – namjerno ili ne-namjerno – jedne druge opterećujemo. Ponekad, jedni drugima okolnosti prikazujemo teškim i nemogućim. Za razliku od nas, Gospodar naš, Allah, dž. š., želi da nam olakša jer smo mi nejak a bića, koja u trenucima slabosti zaborave da nakon

teškoće dolazi olakšanje, kako nas Kur'an podsjeća: "Zaista, s mukom je i olakšica." (El-Inširah, 6)

Nerijetko, čovjek, usljed nagomilanih problema, zapada u defetizam, malodušnost, klonulost, nevjerovanje u izlaz i u uspjeh. To su negativne osobine i valja se truditi da ih se oslobodimo. Najbolja polazna osnova za prevazilaženje malodušnosti i beznađa jest svijest i nada u Allahovu, dž. š., milost, jer nas On poziva: "O robovi Moji koji ste se prema sebi ogriješili, ne gubite nadu u Allahovu milost! Allah će, sigurno, sve grijehе oprostiti; On doista mnogo prašta i On je milostiv." (Ez-Zumer, 53)

Ovaj ajet poziv je svim grijешnicima, nevjernicima i drugima na tevbu – pokajanje i radosna vijest od Milostivoga Gospodara da će oprostiti grijehе onome ko se iskreno pokaje. A Allahova, dž. š., milost obuhvata sve što je na nebesima i na Zemlji, svakog čovjeka, bio on vjernik ili nevjernik, pokoran ili nepokoran.

Pripovijeda se da je neki čovjek zamolio Ibrahimu, a. s., da mu ukaže gostoprimstvo, na što mu Ibrahim, a. s., reče: "Ako prihvatiš vjeru – ugostit ću te." Čovjek se okrenu i ode, nakon čega Allah, dž. š., objavi Ibrahimu, a. s.: "O, Ibrahimu, zašto si mu davanje hrane uvjetovao prihvatanjem vjere? Mi ga hranimo sedamdeset godina a on je u nevjerstvu! Zašto je tebi smetalo da ga ugostiš i nahraniš makar jednu noć?" Ibrahim, a. s., sustiže tog čovjeka, vrati ga i ugosti. Nakon toga čovjek ga upita: "Zašto si promijenio mišljenje i zašto sada ovako lijepo postupaš prema meni?" Ibrahim, a. s., ispriča mu sve kako je bilo, a čovjek reče: "Kako ranije nisam spoznao da se Allah tako plemenito prema meni odnosi?!" Zatražio je od Ibrahima, a. s., da mu objasni vjeru, nakon čega je prihvatio islam.



Allah, dž. š., poziva nas da ne gubimo nadu u Njegovu milost, jer to čine samo nesretnici, i ističe primjer Ibrahima, a. s., koji kaže: "Nadu u Allahovu milost gube samo oni koji su zabludjeli." (El-Hidžr, 56)

Stoga su neki islamski učenjaci gubljenje nade u Allahovu milost uvrstili u velike grijehe.

Jedan čovjek upitao je Poslanika, a. s., o velikim grijesima, pa mu je odgovorio: "Da Allahu pripišeš druga i da izgubiš nadu u Allahovu milost." (Taberani)

Međutim, nije dovoljna samo nada u Allahovu milost i pomoć, potreban je i lični napor čovjeka. Nada se odnosi na ono što se iščekuje, a za to iščekivanje potrebno je ispuniti preduvjete za ostvarenje, preduvjete koji su u domenu ljudskih mogućnosti i izbora. Ono što nije u ljudskoj mogućnosti i u čijem izboru čovjek nema udjela, ostaje u domenu Allahove dobrote. Ako čovjek vjerovanje potvrđuje dobrim djelima i pritom se nada u Allahovu pomoć – to je istinska nada, ona je poželjna jer podstiče i motivira čovjeka da bude ustrajan u obavljanju svega što vodi oprostu. Ukoliko se čovjek prepusti strastima, prohtjevima i haramima pa se poslije toga nada u Allahovu milost – on obmanjuje samoga sebe. Allahov Poslanik, a. s., opisuje takve osobe i kaže: "Slab i nemoćan je onaj ko slijedi svoje prohtjeve, ko se pokorava svojim strastima, a uz to se uzda u Allahovu milost." (Ibn Madže)

Dakle, svaka osoba treba znati da je nada u

Allahovu milost nezamisliva bez dobrih djela. Nada je pohvalna jer motivira, za razliku od beznađa i očaja, koji su pokuđeni jer odvrćaju od činjenja dobrih djela.

Napominjemo da strah nije u suprotnosti nadi. Strah je vjerni saputnik nadi. Imam Gazali kaže da su nada i strah kao dva krila bez kojih se ne može letjeti. Poslanik, a. s., obišao je bolesnika koji je bio na smrti, pa ga je upitao: "Kako se osjećaš?" Bolesnik odgovori: "Allahov Poslaniče, tako mi Allaha, nadam se ali i strahujem za svoja djela." Poslanik, a. s., mu reče: "Kod koga se spoji to dvoje u ovakvoj situaciji, Allah će mu dati ono čemu se nada i sačuvati će ga onoga od čega strahuje." (Tirmizi)

Draga braćo i poštovane sestre!

Milost i dobrota su Allahovi darovi koji su pohranjeni u srcima ljudi i koji ih vode prema dobru. Stoga, vjernik teži dobru i nada se Allahovoj milosti koja mu daje snagu u bezizlaznim situacijama. Zato i znamo reći, uprkos svim životnim tegobama i iskušenjima, da opstajemo samo uz Allahovu pomoć i zbog milosti Njegove, koja nam daje snagu da prebrodimo najteže probleme, situacije i životne trenutke kroz koje prolazimo, bilo kao pojedinci, bilo kao zajednica i narod, bilo kao država.

Gospodaru naš, Ti sve obuhvataš Svojom milošću i znanjem, molimo Te, oprosti onima koji se kaju i koji se nadaju Tvojim milosti. Podari nam dobro i na ovom i na budućem svijetu!

// Umjesto hutbe, islamskazajednica.ba

Postiti – sustezati se od jela, pića i drugih tjelesnih uživanja je u neraskidivoj vezi s govorom o duhovnom aspektu posta.

Jedno bez drugog ne ide. Samo zajedno grade cjelinu

Znamo da tokom posta ostavljanje hrane i pića nije samo sebi cilj, to je sredstvo do cilja. Upravo tome su nas učili učitelji islama, odgajatelji, veliki šejhovi koji nisu dozvoljavali da se o nekom propisu govori samo sa fikhske - pravne strane, već da se uvijek govori i o duhovnoj dimenziji propisa. U ovom tekstu ćemo se referirati na tri takva autora, a to su: Ebu Hamid el-Gazali, Bediuz-zaman Said Nursi i Ahmed Šarani: Ebu Hamid el-Gazali u djelu "Tajna posta, zekata i hadža" kaže:

"Znaj da postoje tri kategorije posta:

Post mase – savmu el-'umum

Post odabranih – savmu el-husus

Post posebno odabranih – savmu hususi el-husus.

Iz riječi Imama Gazalija koji kaže: "Post mase – je post kojim se postači, uglavnom, sustežu jela, pića i polnog općenja," možemo zaključiti da Imam Gazali pod pojmom "masa" misli na dva aspekta; prvo: svi ljudi koji poste se sustežu od jela, pića i polnog općenja. Ima ih mnogo (masa). Drugo: Veliki broj ljudi tokom posta ostaje samo na tome i sustezanje od jela, pića i tjelesnih uživanja im bude jedini cilj.

Za imama Gazalija post odabranih je post onih koji, pored gore navedenog od grijeha čuvaju svoj sluh, vid, jezik i sve ostale organe i osjetila. Ovaj vid posta i jeste želja svakom muslimanu, da sveukupno svoje biće, sva svoja osjetila, unutarinja i vanjska podredi

pokornosti Bogu Uzvišenom.

Post posebno odabranih, prema riječima Imama Gazalija je post onih koji, pored navedenog, poste svojim srcem i mislima, koji se potpuno posvećuju Uzvišenom Allahu, dž. š. Ova vrsta posta se prekida pomišlju na bilo čega ili bilo koga, osim pomisli na Uzvišenog Allaha, dž. š. i Ahiret. Ova vrsta posta se prekida mišlju o Dunjaluku, osim ako je povezana sa vjerom. Ovi, koji poste srcem, govore ovako:"Onaj ko posteći u toku dana razmišlja o tome kako će se i čime iftariti, pogriješio je jer to govori o nedostatku čvrstine u vjeri, o nedostatku sigurnosti u blagodat i obećanu nafaku od Uzvišenog Allaha, dž. š. U ovu treću kategoriju postača spadaju Allahovi poslanici, evlije i dobri ljudi.

Svijest o sebi kao robu i svijest o Allahu, dž. š. , kao Rabbu (Gospodaru)

Kada Said Nursi govori o postu shvatamo da govori o drugoj kategoriji posta post odabranih koju kao takvu definiše Imam Gazali. Said Nursi u djelu „Najbolji gost" o postu kaže: "S gledišta odgoja čovjekove duše, post ramazana sadrži brojne mudrosti. Jedna od njih jeste da nefs (duša) po svojoj ćudi želi biti slobodan i nesputan, pa se tako i odnosi prema sebi. Nefs, čak, za sebe traži i umišlja Božanska svojstva i slobodno kretanje po svojoj želji. Zato nefs ne smatra da se odgaja putem neizmernih Božijih blagodati, a naročito ako živi u izobilju i ako ima moć na ovome svijetu, a nemarnost ga podržava i potiče u tome stavu, on nekontrolirano i nedopustivo proždire Božanske blagodati, poput životinje.

Međutim, u toku blagoslovljenog ramazana, duša svakog čovjeka, od naj imućnijeg bogataša, do najbijeđnijeg siromaha počinje razabirati stvari o sebi te uviđa da ona nije vlasnik, nego nečije vlasništvo, i da nije slobodna i neovisna, nego je podređena i rob... Otuda se oholost njezinog umišljenog gospodstva slama te se prihvata robovanja Uzvišenom Allahu, dž. š. i izvršava svoju temeljnu funkciju, a to je iskazivanje zahvalnosti. Tako, oni koji su naduti od sitosti ne uviđaju stepen blagodati što počiva u korici suhog hljeba, a naročito ako su imućni i dobro opskrbljeni.

Međutim, vjernik za iftarom uviđa da je ta korica jedna skupocjena Božanska blagodati i to mu svjedoči njegovo čulo okusa. Zato postači u ramazanu od vladara do najvećeg siromaha postižu duhovnu zahvalnost Uzvišenom Allahu, dž. š. proisteklu iz uviđanja ogromne vrijednosti tih blagodati. Post ramazana čak i najnemarnijim i najprkosnijim ljudima posredstvom gladi daje osjećaj slabosti, nemoći i neimaštine. I svaki od njih, razmislivši o sebi i o svome

praznom želucu uviđa potrebu u želucu, tako se prisjeti koliko mu je tijelo nemoćno i nejako, podložno propadanju, i koliko je ovisan o Božijoj milosti i sažaljenju, te duboko osjeti težnju da, sasvim bespomoćan i izrazito siromašan, pokuca na vrata Božijeg oprostosa oslobodivši se faraonske oholosti svoje duše i spreman da rukom duhovne zahvalnosti pokuca na vrata Božije milosti, ako mu gaflet (nemarnost) nije u potpunosti iskvarilo srce."

Svijest o zajednici muslimana

Duhovni učitelji poručuju da vjernik posteći mjesec ramazan bolje razumije svijet i okruženje u kome živi, i da je on socijalno biće koje je u stalnoj korepondenciji sa drugima, kako u pojavnom svijetu tako i u duhovnom svijetu jer je oko nas u svakom trenutku svijet meleka, džina i šejtana. Jedna iz izobilja mudrosti posta, okrenuti prema društvenom životu čovjeka, jeste činjenica da su ljudi stvoreni različiti sa gledišta načina preživljavanja.

Prema tome Uzvišeni Allah poziva bogate da pruže ruku pomoći svojoj braći siromasima. Oni ne mogu u potpunosti imati osjećaja za njihovo žalosno stanje i glad osim kroz gladovanje nastalo putem posta. Pa, da nije posta, mnogi bogataši, koji slijede svoje prohtjeve ne bi mogli razumjeti koliko potrebu siromasi imaju za sažaljenjem i milošću."

Imam Šarani u knjizi "Poslanikove smjernice za svakodnevni život" navodi sahih predaju od Taberanija, Hakima i Bejhekića da je Poslanik, a. s. rekao:

"KO NAHRANI SVOGA BRATA DO SITOSTI, NAPOJI GA U CIJELOSTI, ALLAH GA UDALJI OD DŽEHENNEMA KOLIKO SEDAM HENDEKA, A IZMEĐU SVAKOG HENDEKA JE RAZDALJINA KOLIKO PETSTO GODINA."

U duhovni aspekt posta svakako treba navesti i sljedeće riječi imama Šaranija: "U koristi posta spada i to da post sprečava šejtanske puteve u tijelu postača i postaje štit, pa šejtan nije u stanju da nađe bilo kakvog načina i prolaza u njegovom tijelu kako bi mogao prodrijeti u njegovo srce i to traje od godine do godine, od ponedjeljka do četvrtka, od četvrtka do ponedjeljka, ili od bijelih dana do bijelih dana. Od Ašure do Ašure, od dana Arefata do sljedećeg dana Arefata." Kada govorimo o duhovnom aspektu posta nužno je navesti hadis Poslanika, a. s. u kome se opisuje jedna od nagrada onima koji su sproveli u djelo sve gore navedeno: "Onome ko isposti raman, vjerujući i očekujući nagradu od Allaha, bit će mu oprošteni do tada učinjeni grijesi." (Buharija, Muslim)

Sve navedeno možemo smatrati kao jedan kratki uvod ili smjernice koje nas upućuju na istraživanje i razmišljanje o duhovnim aspektima posta. Postiti – sustezati se od jela, pića i drugih tjelesnih uživanja je u neraskidivoj vezi sa govorom o duhovnom aspektu posta. Jedno bez drugog ne ide. Samo zajedno grade cjelinu. A cjelina jeste vjernik koji je bogobožan, Allahu, dž. š. predan, zahvalan i koji se čisti od grijeha. Sve nabrojano je i svrha samoga posta.

/ Preporod



Fond Bejtu-l-mal



“Zekat pripada samo siromasima i nevoljnicima, i onima koji ga sakupljaju, i onima čija srca treba pridobiti, i za otkup iz ropstva, i prezaduženim, i u svrhu na Allahovom putu, i putniku namjerniku. Allah je odredio tako! A Allah sve zna i mudar je.” (Et-Tevbe,60.)

Ovim Kur’anskim ajetom date su smjernice za djelovanje muslimana i muslimanske zajednice u pogledu raspodjele zekata, a putem prakse Muhammeda alejhi selam i praktično je ukazano na način prikupljanja i raspodjele zekata. Organizirano prikupljanje zekata je praksa muslimana još iz vremena Božijeg poslanika Muhammeda alejhi selam i pravovjernih halifa. U vrijeme Muhameda alejhi selam, pravovjernih halifa i njihovih nasljednika zekat se organizirano prikupljao u državni fond Bejtu-l-mal, iz koga se distribuirao prema prioritetima i uputama utemeljenim na pomenutom Kur’anskom ajetu. Većina islamskih pravnika se slaže da obavezu i pravo na prikupljanje i raspodjelu zekata ima islamska vlast u islamskim državama, a u neislamskim državama zajednica muslimana na čelu sa vrhovnim vjerskim autoritetom.

Kur’anski ajet u kojem se govori o obavezi zekata “ Uzmi od dobara njihovih zekat da ih njime očistiš i blagoslovljenim učiniš...”, praksa i upute Muhammeda alejhi selam, njegovih ashaba, kao i mišljenja većine uvaženih šerijatskih pravnika ukazuju na čin-

jenicu da je zekat prvenstveno društvena obaveza i da je za potpuno ispunjenje te obaveze odgovorna cjelokupna zajednica muslimana, prije svega, u islamskim državama islamska vlast, a u neislamskim organizirane zajednice muslimana, koje su dužne da organiziraju prikupljanje i raspodjelu zekata u skladu sa Kur’anskim uputama i uputama Muhammeda alejhi selam. Također, zekatni obaveznici su dužni da savjesno i odgovorno ispune svoju obavezu, u skladu sa navedenim upustvima vođstva muslimanske zajednice kojoj pripadaju. Od strane Islamske zajednice bivše Jugoslavije organizirano prikupljanje zekata i sadekatu-l-fitra je počelo krajem šezdesetih godina prošlog vijeka osnivanjem Fonda Gazi Husrevbegove medrese. Pojam Fonda Bejtu-l-mal na našim prostorima prvi put je korišten u članu 12. Ustava Islamske zajednice u SFRJ iz 1990. godine. Sadašnji Ustav IZ u BiH, koji je donesen 1997. godine, predvidio je da sredstva od zekata, sadekatu-l-fitra i kurbana čine Fond Bejtu-l-mal i da upravljanje tim fondom propisuje Sabor IZ u BiH posebnim aktom. Izmjene Ustava Islamske zajednice u BiH, donesene u 2014. godini, propisuju da pored Rijasetu i Sabora Islamske zajednice u BiH, raspodjelu sredstava iz Fonda Bejtu-l-mal određuje i Vijeće muftija i ono ima ključnu ulogu u raspodjeli, tako da sada postoje tri nivoa kontrole utroška sredstava iz pomenutog Fonda.

Sabor IZ u BiH je u aprilu 2004. godine donio Pravilnik o Fondu Bejtu-l-mal. Ovim pravilnikom definiran je Fond Bejtu-l-mal, ustanovljen je način punjenja i raspodjele sredstava iz njega, način upravljanja fondom i druga važna pitanja za funkcioniranje Fonda. U članu 7. je propisano da Fondom upravlja Rijaset IZ u BiH. U članu 8. navedenog pravilnika propisano je da se sredstva Fonda koriste za odgoj i obrazovanje u srednjim, višim i visokim obrazovnim institucijama koje djeluju u okviru Islamske zajednice u BiH ili je ona njihov osnivač, za održavanje i unapređenje mektebske nastave, za pomoć povratničkim džematima, kao i druge vidove islamskog rada koji se odvijaju kroz organe i ustanove IZ, a kojima se podiže vjerski kulturni, odgojni i obrazovni nivo muslimana, te za druge namjene koje su od opće koristi za muslimane i Islamsku zajednicu.

Odluku Rijasetu o raspodjeli sredstava iz Fonda Bejtu-l-mal, mora potvrditi Vijeće muftija, a nakon toga i Sabor IZ u BiH. Pravilnikom o Fondu Bejtu-l-mal je predviđeno da će se nastojati, sredstvima Fonda, u svakom vremenu osigurati najnužnije uvjete za rad Gazi Husrev-begove medrese, Fakulteta islamskih nauka u Sarajevu i Gazi Husrev-begove biblioteke. Također je predviđeno da Rijaset svake godine, prilikom definiranja raspodjele, utvrdi optimalan iznos sredstava koja će iz ovog Fonda izdvojiti za pomoć povratnicima u razorene džemate i drugim socijalno ugroženim licima.

Pravilnikom je, također, propisano da se akcija prikupljanja zekata i sadekatu-l-fitra sprovodi u organizaciji Rijasetu IZ u BiH i da se prikupljena sredstva posebno knjigovodstveno evidentiraju kao sredstva Fonda, a od ukupno prikupljenih

prihoda od zekata i sadekatu-l-fitra na nivou medžlisa u BiH 70% se usmjerava u Fond Bejtu-l-mal, 25% ostaje medžlisima za vjersko-prosvjetni fond pri medžlisu i izmirenja troškova ukupljanja, a 5% nadležnim muftilucima za vjersko-prosvjetni fond pri muftijstvu.

Od sredstava prikupljenih u dijaspori 60% se uplaćuje u Fond Bejtu-l-mal, a 40% ostaje džematima i krovnim organizacijama IZ BiH u dijaspori.

Mešihati islamske zajednice, na čijem području djeluju islamske obrazovne ustanove dužne su formirati svoj Fond Bejtu-l-mal i iz tog Fonda doznačiti 5% u Fond pri Rijasetu za finansiranje zajedničkih organa i institucija.

[Www.zekat.ba](http://www.zekat.ba)



VRATIMO DŽAMIJAMA NJIHOVE NAJLJEPŠE UKRASE

Bliži nam se najodabraniji mjesec, vrijeme posta i ibadeta te neizmjerne Allahove milosti i bereketa. Hvala Bogu, ove godine u drugačijim okolnostima od prethodna dva ramazana kada nam je pristup džamijama i zajedničkim namazima bio ograničen pa nismo mogli osjetiti onu ramazansku atmosferu na koju smo navikli prije pandemije: zajedničke iftare, pune džamije, razne ramazanske aktivnosti, mukabele, druženja i zikr do samog sehura i sl.

Konačno nam blagoslovljeni mjesec dolazi u koliko-toliko normalnim okolnostima, barem što se tiče ograničenja i mjera uzrokovanih pandemijom. Ipak, naša briga da će nam džamije i ovoga ramazana biti poluprazne je potpuno opravdana. To možemo naslutiti na osnovu sadašnjeg stanja u našim džematima, u domovini i u dijaspori. Dnevni namazi, druženja, predavanja, vjerski programi, sve je mnogo manje posjećeno nego što se očekivalo – i to kada se konačno možemo vratiti u naše džamije i džematske prostorije.

Da li se radi o tome da nam ipak treba malo više vremena, možda smo nesigurni ili strahujemo još uvijek? Ili smo se, ne daj Bože, previše otuđili od džamije, od džemata i jedni od drugih? Da li smo prešli u stanje komforosti, zadovoljni da putem društvenih mreža pratimo poneko vjersko predavanje ili ramazansku mukabelu – sami, u udobnosti svojih domova, ne želeći da to promijenimo? Da li smo zamijenili prisustvo u džamiji online prisustvom?

Zajednica, džemat, je jedan od veličanstvenih principa naše plemenite vjere. Poslanik a.s. kaže: “Allahova pomoć je uz zajednicu”. (Tirmizi)

U toku svog života, Muhammed, a.s., je često naglašavao vrijednost zajednice i džemata i podsticao na zajedničko obavljanje namaza, sugerišući da namaz u džematu za svakog vjernika ponaosob vrijedi 27 puta više nego kada ga obavi samostalno (Buhari). Jedan od razloga tolike vrijednosti jeste i što nas taj zajednički ibadet zbližava i povećava ljubav jednih prema drugima, u ime Allaha, dž.š. Da bi se ovaj princip ukorijenio u dušama muslimana, propisano je zajedničko obavljanje i nekih drugih ibadeta, poput hadža i džuma-namaza, naprimjer.

Poslanik, a.s., se upravo zbog te vrijednosti i plemenitog cilja trudio da svi njegovi sljedbenici osjećaju ljubav prema džamiji i džematu. Čak i majkama sa malom djecom koja su plakala je, skraćujući namaz, dao na znanje da su dobrodošle u džemat. Umjesto da nekoj majci kaže kako njeno dijete ometa namaz drugih i kako bi možda trebala razmisliti o tome da ne dolazi u džemat dok joj djeca ne odrastu, on je skratio namaz da bi ona znala važnost svog prisustva u džamiji, u džematu. Dao joj je do znanja da je i ona cijenjen član zajednice te da njen duhovni rast i razvoj ne moraju ispaštati jer ima malo dijete. Radije bi skratio namaz nego da žene s djecom ne dođu.



Zbog toga je to bila zajednica duhovno jakih muškaraca i žena. Samo tako su mogli odgajati snažne i uspješne naredne generacije muslimana koje su dale maksimalan doprinos širenju islamske vjere te nauci i dobrobiti čitavog čovječanstva.

Zajedništvo, zbližavanje te međusobna ljubav i uvažavanje, doprinose boljoj budućnosti svih ljudi. To osnažuje porodicu, džemat, zajednicu i, konačno, cijelu državu. Takav ambijent skupova ljudi, socijalna bliskost i kontakt, odlikuje upravo Božije kuće. Džamija, dakle, može i treba biti mjesto odakle polazi pozitivna promjena u društvu, centar naše sreće i uspjeha na oba svijeta.

Materijalne konstrukcije bez ljudi u njima su propale investicije. Najljepši ukras džamije je upravo njen džemat. Poslanikova džamija je bila mala, jednostavna i skromna. Nije imala ukrašene zidove, klima uređaje, niti udobne tepihe, ali su se na poziv mujezina svi odazivali, i mladi i stari, i muškarci i žene, i bogati i siromašni.

Ramazan je posebna blagodat koja donosi čistoću srca i duše. Prilika da se otvorimo jedni prema drugima i da se kroz zajednički ibadet u našim lijepim džamijama približimo i povećamo prisnost. A to nam je najpotrebnije u ovom vremenu punom straha i neizvjesnosti, virusa i bolesti te političke nestabilnosti kada sve više zaboravljamo jedni na druge. Sada nam je, više nego ikada, potrebno da otvorenih ruku i srca pokušamo da se – vraćajući se Allahu i našim džamijama – vratimo sebi i jedni drugima, da crpimo tu duhovnu energiju iz Božije kuće, iz namaza i posta u mjesecu Allahove milosti koja će nas okrijepiti i dati nam snage za životna iskušenja. Zajednički se lakše podnose poteškoće i do rezultata uspješnije dolazi zajedničkim naporom cjeline – džemata.

Ako smo prethodna dva ramazana mi plakali za našim džamijama, ne dozvolimo da one sada plaču za nama!

//Adela Jusmani Kazija, Preporod, mart 2022.



Uspomena draga kao rijeka teče.

Nad Saraj'vom mojim
ramazanska večer.

Kandilji s munare Begove džamije,
Otkrivaju tajnu koju srce krije.

Lagano koračam preko starog mosta,
da dočekam svoga najdražega gosta.

Kad zauči ezan sa vrha bistrika,
Odgovara tekbir s visokog vratnika.

Sarajevo cijelo prekrili ezani,
radost nek donesu ramazanski dani.

Sarajevo drago prekrili ezani,
ko biser se nizu ramazanski dani.

Dižem bijele ruke tiho učim dovu,
sačuvaj nam bože našu Bosnu ovu.

Primi roba svoga u okrilje svoje,
iz dubine tiho šapnu srce moje.

Preko starog mosta
zastalo je vrijeme,
da sa pleća skinem otežalo breme.

Velika je milost mjesec Ramazana,
poteče iz vrelog ašikovog džana.


Allahu ekber Sarajevo zbori
nesta one tuge što mi srce mori.

Ramazanska večer – Hor Rejjan



Ramazan

u Bosni i Hercegovini



Zajedno 24 sata

FACEBOOK

You Tube



ISLAMSKA ZAJEDNICA BOŠNJAKA
U ŠVEDSKOJ

IZBUS

mc

Media centar
Islamske zajednice u BiH

Radio



Novina



Agencija



Portal



Produkcija



WWW.IZB.SE

BILTEN

Informativne novine
Islamske zajednice Bošnjaka u
Švedskoj

GLAVNI UREDNIK

Idriz-ef. Karaman,
glavni imam

IZVRŠNI UREDNIK

Nezir-ef. Špiodić

E-MAIL:

bilten@izb.se

WEB:

www.izb.se

IZDAVAČ:

Islamska zajednica Bošnjaka u
Švedskoj

SEKRETARIJAT

Mail: kontakt@izb.se

Tel: 0520-49 90 64

Mob: 0763-10 24 47

Adresa: BIS, Åkerssjövägen 10,
461 53 Trollhättan



Pređiftački program

Svaki dan Ramazana


u 19:00h!



BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ

IZBOS

NBW



Ramazan Šerif Mubarek Olsun

Islamska zajednica Bošnjaka u Švedskoj